

四庫全書

集部

欽定四庫全書

集部

樂全集三十七

詳校官庶吉士_臣龍廷槐

檢討_臣何思鈞覆勘

總校官中書_臣朱 鈐

校對官中書_臣吳 俊

謄錄監生_臣楊兆豐

欽定四庫全書

樂全集卷三十七

宋 張方平 撰

神道碑

推誠保德崇仁守正忠亮翊戴功臣開府儀同
三司守司徒致仕上柱國岐國公食邑一萬九
百戶食實封三千九百戶贈太師兼侍中謚

曰恭潁川陳公神道碑銘并序

褒忠之碑者體天法道欽文聰武聖神孝德皇帝神筆

所題以表揚故相贈太師兼侍中岐國公執中之遺烈也惟公再登元宰當國之重體直方大實有常德素履終吉不失其正故聖上兼天日之明稽春秋之義顯其大節章示無窮夫其誠心之所感者深故於恩禮之垂荅也厚教勸流於朝序盛美光於國牒君臣之道斯為至矣謹按公宇昭譽豫章南昌人烈考韓國公恕以器望忠力參知政事太宗真宗時為任職舊臣總邦計十餘年典刑在朝功利在民建今計府凡財策利權率循

陳侯故事終於尚書左丞集賢殿學士公風骨英秀氣
韻粹深河目犀角居然公輔之表初以廕授秘書省正
字非其好也學問通大義不為章句志欲以奇策高議
感結明主自致功名初仕衛尉丞監征慶州值朔方款
格疆場解戎條遠御之略上河西兵機五事繇此聲迹
聞於時秩滿知泉州惠安縣復拜疏論時政語侵要近
益遠徒知梧州公奮曰天子明聖匹夫罔不獲自盡度
吾材必有當者研精覃思著當世之務撰復古要道三

卷驛置上聞章聖覽而善之曰此固名父之子為國敢
言可用也即召赴闕是時今上盛德日新而未出閣天
下屬望大臣莫敢為言公又上演要三篇發明家國大
策請時建儲位以正萬邦叅用公卿兼領保傳諷諭詳
切出於精誠書奏天子異焉翌日袖以視朝先出他疏
於執政曰何如皆贊曰善帝指所袖曰是更有佳奏即
公所上三篇也復出示之執政相顧媿謝既而召公對
便坐慰問移刻擢為右正言先是諫署久不補繇公始

復置負公既以納說時君被遇特達思効忠益展意無
所依違表請增諫官延讜議每言事引大體慷慨輒見
荅禮權寵忌之屬御試進士以公編排試卷坐第次小
差罷諫職還衛尉丞權酷岳州永州改太子中允通判
歙州撫州累年江湖天聖初還朝遷殿中丞復正言上
雅知公意將顯用公前在諫官常論曹利用事至是利
用言宜且試之治民復出知漢陽軍歲餘召還道丁內
艱服除補三司判官復知諫院直集賢院提舉在京諸

司政尚書工部員外郎兼侍御史知雜事賜三品服遷
刑部員外郎充三司戶部副使拜天章閣待制知應天
府徙江寧府遷工部郎中知揚州召還上志先定用公有
指宰相復有間言者除龍圖閣直學士知永興軍未幾拜
右諫議大夫同知樞密院事昊我叛命西師暴野嘗被手
詔問經制方畧條畫敷啓多見納用久之罷知青州尋拜
資政殿學士工部侍郎充陝西兵馬都部署經略安撫
招討使兼知永興軍羌大入朝那攻圍延安連拔堡戍

再踐平涼塞覆軍殺將邊鄙日聳天下被其勞詔公徒
幕府回中示鎮撫之重固闕陝根本公下令諸路凡騎
寇來鈔擄獲自入故其戰人人知趨利除野堅壁詐力
必屈是歲賊果犯河外破豐州斷麟府西陲盜衰止公
以謂兵事尚神密千里稟命舉後機會非所以制勝宜
屬四路各保疆圉治軍禦寇可濟事功累表便宜且歸
兵柄朝議善其策就除知陝州復徙青社沂州卒王倫
害戍將構亂輕游附從至擁旗鼓入城邑殺掠吏民郡

縣惶擾失據公召京東都巡檢使傅永吉謂之曰是雖微孽敢涉吾地並淮且渡江若蹈無人之境使民間而有姦桀豈不生易朝廷之心歟若趨躡之賊不得勿還也永吉受命恐慄窮追至歷陽采石磯力戰賊黨殲焉上聞嘉歎璽書褒獎慶厯四年召除參知政事內璫馳遽來錫命示眷待之加非常例也未朞同中書門下平章事集賢院大學士初西方有釁師久無功上命二相兼樞密使俾協謀議以便處置既羌酋納款罷兵歸庭

塞徼無事而宰司領右府遂習為常公以為權宜之制
盍復祖宗之故乃謝解樞柄秉政五年以足疾辭機務
章十餘上除尚書左丞知陳州上意不足公曰先臣終
此官臣幸已過後相更以為言乃拜兵部尚書祀明堂
進天官加觀文殿大學士制授集慶軍節度使同平章
事判大名府復以吏部尚書召冠宰司又逾二年足疾
增劇求近藩久之制授鎮海軍節度使同平章事英國
公判亳州公繇世資自致通顯初不藉交黨引重為名

高挺拔特立峻清不雜如絕壁千仞高倚霄漢事上待
下直誠無飾不違道以干譽不矯情以圖全退朝闔門
不受私謁詭行游說浮薄之士無敢自通性嚴毅有威
重寡言笑其在朝廷陟降進止皆有常度舉措時當攝
大柄斷國論凡進對謨議未嘗漏言有猷有為世莫聞
知善則稱君過以歸已而已專務遠權勢匿名迹及其
久也天下信之故上察公行慎厚眷委之心特密焉
在毫乞歸養疾不許堅納旌節改尚書左僕射觀文殿

大學士徙判河南府兼西京留守司過闕不任覲謁求
易曹州恩旨留京師便醫內侍勞問賜黃金珍劑視其
有瘳蓋屬任之意存焉瀝懇告老輒被手詔敷止逾年
疾日侵始蒙軫聽嘉祐四年二月制除守司徒岐國公
致仕越四月十八日薨享年七十屬乾元節宴羣臣是
日休暇聞訃即時乘輿臨哭酌不視朝三日榮贈太師
兼侍中發哀苑中文武叙班殿門進名奉慰凡贈祿恤
禮率加常典太常議謚曰恭其配吳國夫人謝氏諫議

大夫泌之女端操淑範配德具宜公薨纔彌月而夫人
繼歿即以七月二十八日合葬於京城西南韓公舊塋
實祥符縣之西韓村大王父追封衛國公嵩王父追封
燕國公光嗣逮先正韓公並贈太師尚書令兼中書令
曾祖妣二黃氏祖妣孫氏妣王氏李氏齊魯陳秦國
太夫人嗣子世儒太子右贊善大夫方八歲岐嶷有至
性法相惟肖陰隲善慶必克纂續六女皆封郡縣君長
適屯田郎中李章次大理評事宋均國次光祿寺丞王

果餘尚幼公之薨也上軫之深時季弟將作監執方知
曹州驛召俾護喪事又命壻章幹其家執方有器行而
章材敏公所愛厚故朝廷因其意而命焉初韓公見公
讀漢書問公盍言爾志公對曰平津侯有言人主患不
廣大人臣患不儉約竊謂名理韓公默然心知其志
之遠也及公鎮關中委統帥之權登政府避監總之重
再至上宰一心在公未嘗敢因緣恩威為市及其去位
深自裁挹不敢以隆名重器自處在景毫納旄鉞以為

養疾便藩不宜尸厚祿墮然抑畏固以寵利居成功都城僻坊有韓公敞廬再入相方贖取之門不容回車僅蔽風雨不營貲產家無僮伎四方竿牘苞苴問遺之私莫敢至其門故世謂韓公知子之明而公可謂亦允蹈之者也燕居如齋未嘗見懈惰之容非朝服不見賓客所接無貴賤率盡誠禮不妄為歎狎故平生與人無憾恨之隙無侵侮之羞將東首神爽恬泊親札召其壻章屬之後事封署端楷猶如平日其資性莊重如此銘曰

岐公直專其誠也天其重如山其止如淵秉心宣猶靖
共惟履蹈道之正秉德之全顯允韓公匪躬徇國宣力
汝為有民汝翼利盡事功忠存衮職實著義方貽我淳
則公起世家泱泱大志玉氣莫掩揀材拔萃明主我知
青雲自致絕塵遠騁摩霄高厲遂登臺閣爰陟公卿立
朝正色於國乃情不援不陵不將不迎得之自是直哉
惟清密勿中樞本兵之柄左右泰階執國之政入告善
猷出賦明命式是百辟時庸嘉靖典刑是修舊章是由

敢曰識知祖宗之謀匪福匪威莫我德尤無好無惡孰
為黨讎天生蒸民有物有則時惟淫朋人用僭忒我求
之身王道正直愛莫助之會於有極不回不疚期處其
厚無遠四方相在屋漏譽非余同毀非余否常德不渝
克堅其守不否不同其守彌冲天子曰忠天下曰公賢
人之業本於易從全其神明始為令終允文大君獨照
精實揚其惠節寵以神筆聲烈烜明恩禮周密有恤幽
堂永對天日

推誠保德功臣正奉大夫守太子少傅致仕上
柱國昌黎郡開國公食邑三千三百戶食實封
八百戶賜紫金魚袋累贈太師中書令尚書

令許國公諡忠憲韓公神道碑銘

并序

公諱億字宗魏真定靈壽人父信國公始家京師咸平
中進士擢第除廷尉平知亳州永城縣永城劇邑當津
衢衝要本縣吏部銓補今久不治始命審官除吏公釋
褐為選首初署事聽決辯訟如宿吏精習文法者縣大

治郡將皇甫選時名士有賞識數試公以事平處詣理
稱歎曰能由是著材名部司察舉治狀遷大理寺丞通
判陳州徙單州丁信公艱去官服除通判許州復徙陳
河決屬邑衍溢民田廬計役費隄塞鉅萬公按形勢以
便宜就功一不賦民河復故道有劇盜聚郡境匿諸艦
中期會攻刼公廉知之揣其所過抵夜率吏匿河上流
舉火伐鼓以駭之賊棄舟迸潰邀捕無脫遺者轉運使
鄭文寶喜謀略聞而壯之被公檄至於許曰急欲識公

面顏爾遷殿中丞章聖嘗覽公文俾召試外舅太尉王文正公當國避嫌以為言特召對改太常博士知洋州郡有豪吏李甲兄死迫嫁其嫂而誣兄之子為攜養以專其貲嫂流離歷許州及司官數置對甲輒賂吏掠服之積十年寃不伸公至復出訴為索舊牘詳閱鍛鍊牢密但未嘗引乳醫為證微伺之尚存奄召驗問辭服案竟姦黨母子始如初改屯田員外郎知相州河北旱蝗轉運使靳租調蔽匿災害公抗章極論詔書嘉獎為蠲

賦役百姓賴以全活故相張文節公鎮魏薦公文中御史被召除殿中侍御史淮浙饑命公安撫所至先察吏治宣布慈惠救荒之政畢舉合肥舊陂久為豪家彊占公按復之民得其饒未還除開封府判官一日奏事畢趨出至屏外復召賜五品服章俄除河北轉運使別旨留公為故相河內公均其室初向氏長安華嚴有美田時丁朱崖擅朝欲得之諸子已聽命使所親諷公公不荅而謂向氏土田衣食之源宜共保之故華嚴不以分

崖州大以為望既赴河朔獨領其職會章聖御樓晏駕
今上踐祚軍賞重沓河北厚屯戍經用常不贍朝廷憂
之公心計精密均輸從容以辦鎮定帥曹瑋有威名朱
崖亦忌之以大將軍斥知萊州以其得士心慮或逗撓
詔公馳傳統其兵緣是同隙欲有以中傷公者公舉措時
當處之無間改司封員外郎加直使館徙知青州未幾召
為侍御史知雜事賜三品服章遷工部郎中時中丞缺
久不補公專臺務都下有告急變者中貴人夜開禁門

逮卒百餘輩付臺公一訊情得悉釋其縛中貴人以捕
反者為已功日傳詔促案及獄具止誅告者三司更權
茶法權利虧廢詔公劾前議者條罰自丞相率數案詔
獄持法平不撓權倖二宮知公秉誼不回可任國之重
摧龍圖閣待制器望風采益為當世鉅人重德天下以
其出處為時輕重矣被命刪定法令審覈條次科比明
慎書奏因請頒示天下人得盡其情以議有文害者
更之冀以便安萬姓於後每編修制勅必循此例久之

出典亳州未幾召領審刑故事諸州獄疑讞有令後讞寢
繁天下多留獄公建言諸刑科當讞者為傳中比著于令
以省奇請之敝又四方上具獄理官當報日程賒緩亦因
緣開姦利公奏促其程由是州郡省滯繫獄以清知星者
言蜀且有兵變若災沴公被選以樞密直學士諫議大
夫知益州陞辭二宮諭以占說公頓首曰願以屬臣至
蜀果旱薦饑公以愛利為政安輯荒散均節賦調先蜀
守張公詠以蜀地狹生齒衆嘗艱食為請歲發倉儲六

萬斛賤估以贍貧民遂緣為常公先期倍數以賑之故
民不大乏自秦李冰鑿離堆避沫水之害穿二江成都
中醴以溉田若歲大旱溝塍猶涸公更決九升口水行
徑易迄今享其利初二宮以蜀災害為憂既而聞公綏
靖之美有旨召公參知政事宰相白益部遠方宜須代
還以拜以緩其命而援所厚善故公命中格除御史中
丞充理檢使蜀之西境邛部烏蠻接雲南地多馬歲入
永康官場鬻之經歷山川道路周知其夷險公還對請

徙場沈黎自此蠻夷窺蜀有以隔限會中宮虛位公抗
章請擇舊門淑德與大臣定議舉典禮聘納以示母儀
之重既而下果有自細微覲倖上配者焉季良自貶所
遣所親扣登聞自通而潛賂要地得致仕言事者以謂
致仕所以優賢季良在流放未有罪人致仕者詔公劾
登聞吏不當通其辭公以謂可否在執政吏何罪之劾
納勅不奉行議者以為得體又按唐典奏置御史裏行
四員以廣言職奏疏論朝政時務其言深美多法義上

嚮納之益欲登用歲中遷工部侍郎同知樞密院事樞密本兵之地是時天下乂安上下習於優游武備寢弛公獨以為憂建言為國者思患預防故萃以戒不虞請下二府各任堪將帥者稍試用之觀其器能又言將不可不知權謀形勢之法上為親集四種之要名曰神武秘略頒諸邊將使習通之嶺外蠻夷或恣睢屯聚輒下湖湘之甲或發畿兵奔命率不及事又北軍涉冒溫暑瘴氣多死亡公奏置廣南東西路鈐轄司增募土兵戍

守南粵便安夏戎內附其人至京師一切自便公揣昊
酋野心請為除館屬吏司其市事驛道護以往還視若
優為之禮實以羈防其姦謀既而邈川與夏戎連兵洮
人來獻捷朝議賞典公曰二羌皆藩臣擅相攻擊若又
加賞是驕邈川而怒夏人非綏御四夷之道固執不可
而止凡武經邈備惟思日孜孜景祐四年授叅知政事
占謝之日召坐嘉西府之勤勞勉久之尋遷戶部侍郎
是歲地大震定襄災異數見公方在告力疾入對為上

精言其端以為地震陰有餘外蕃中國之陰也其深戒外蕃之患又請下詔求直言消復之術上納用焉久之罷政事改吏部侍郎知應天府越二年夏酋叛暴突彊場覆軍殺將天下共其勞識者悼歎儻公在位戎難不及於此既而契丹氏乘釁來渝平授公資政殿學士知成德軍入覲在道內璫齋手詔問攻守方略公條邊策甚詳時劉平敗沒延州邊臣以降賊聞有司設防守將收其孥公因對言平在軍戰甚力毋降屈之狀上意釋

然更加恩恤如死王事者尋改澶淵以控北道之衝屬
疾因請便郡復徙亳州地當東西京淮甸之交故盜充
斥連發境中民相恐公以耳目檣起賊區處乃府大校
為之囊橐掩捕百餘人磔諸市自此羣輩散落井間清
淨訖公去郡不復有盜就遷尚書左丞拜章固讓詔書
褒答慶歷二年請老授太子少傅致仕四年八月十五
日薨於京師私第享年七十三上悼傷廢朝祔恤用優
典贈太子太保太常考行謚曰忠憲二夫人蒲氏王氏

皆先公歿追封安定太原二郡太君繼室太尉文正公
之女某年月日葬於許昌長社縣嘉禾鄉從先塋禮也
曾祖某贈太保妣張江國夫人祖某贈太傅妣李舒國
夫人考贈太師尚書令中書令信國公妣郭越國夫
人周吳國夫人三世德厚流光在公公郭之自出八子
曰綱尚書水部員外郎綜刑部員外郎知制誥絳翰林
侍讀學士諫議大夫環慶路馬步軍都部署經略安撫
使知慶州繹某官維某官集賢校理續殿中侍御史緯

某官縞某官材業重於朝廷譽望著乎臺閣隨其器能而並篤於行誼義方忠教固有根本綜先卒諸子通顯累贈公太師中書令尚書令許國公女六人適端明殿學士戶部侍郎李淑某官蘇舜賓太常博士王整其一早卒二尚幼諸孫十三人宗彥度支員外郎集賢校理三司判官早卒宗道宗師登進士第餘皆宦學修立詵詵盈庭盛矣公性質方重正色立於朝若大議論一登於言確乎不可轉也事上待下本於忠恕閑邪存其誠故技巧詭

激之為不接於心術雖燕居未嘗見其情容其家事尤
理清規素範不為勢利增改書有之作德心逸日休易
曰視履考祥惟公之素履所謂德有基而道有本其旋
元吉而大有慶宜哉銘曰於休者德忠憲韓公文武之
道大者在躬直方以動允蹈於中能盡其性周爰始終
釋中從政知微之顯歷令刺守風聲日遠載采於朝臺
閣之踐有翼有為惟時為憲睿明能哲屬畀機衡公不
敢康懼思盈平儆戒無虞夙興竭精戎難既作知公忠

誠年至得謝遂傳家事天錫蕃祉慶延於世子孫振振
卿材國器几杖優游百福全備公葬信公長社之原今
從先子歸安故園大物芸芸各復其根惟其神明一氣
同存

推誠保德守正功臣正奉大夫尚書戶部侍郎

知潁州軍州事管內勸農使上柱國汝南郡

開國公食邑二千戶食實封四百戶賜紫金魚

袋贈兵部尚書謚文忠蔡公神道碑銘并序

國朝沿唐制設進士科取天下髦俊其擢第一多至顯位以間得英才國器章聖御極二十五年選士十二榜有若王文正公曾李文定公迪蔡文忠公齊皆擢進士第一登翊大政為時名公此英才國器者大中祥符八年方太平用文治天子臨軒試貢士采賈誼之言賜賦題曰置天下如置器時文忠公預試上覽其賦有安四方之志異焉既唱第廷中考等果第一召前風采堂堂英秀挺出章聖屬目顧相寇準曰佳哉士也殿上下聳

觀舊事唱高等三人數而擇焉是日即命公獨謝特詔
金吾給七人清道為之光寵釋褐將作監丞通判兗州
徙濰州歸朝遷著作郎直集賢院判三司開拆司歷石
正言右司諫同修起居注改尚書禮部員外郎兼侍御
史知臺雜事同判吏部流內銓更三司副使奉使契丹
國還授起居舍人知制誥同知審官院入翰林充學士
俄兼侍讀學士久之除龍圖閣學士知密州徙應天府
召為諫議大夫權御史中丞加給事中復除龍圖閣學

士權三司使拜樞密副使進尚書禮部侍郎叅知政事
閱四歲罷以戶部侍郎知潁州薨於郡享年五十二公
字子思其先洛陽人曾祖綰太平興國中為萊州膠水
令九年卒官有遺愛子孫因家焉祖隣考夢臣世傳經
術懷道不仕以公之貴追祫三師公幼自立苦學故相
文定李公見其詩謂人曰此君有大志未易量也將就
鄉舉才名當首送致書州將讓其里人史房而身下之
始至兗州長吏有苛政公約之以禮使不得踰法民賴

為安至濰有士族募市征印文相因緣為姦利積十餘
年或告發之株連數百人公曰盡利為民姦是用長茲
為政者之過為從末比多得釋濰人大懼愧更相勉為
義識者知公非苟為德是謂民風化之所自迹近而體
遠者蓋其初仕已達於從政秩滿還都不過執政之門
在勢有弗悅累月不召乃差監永豐倉真宗知之詰輔
臣亟令召試文奏御中旨除官明年賞花禁苑羣臣退
獨留公出仁宗所賦詩示之將命為太子諭德為弗悅

者沮格章聖知其有公輔器眷屬殊厚永定遺弓哀慕
深至家人視其卧衽涕洟沾濡丁謂顯國使人語公能
自致即處華要公歎曰茲言何為而至於我竟不荅未
幾謂敗反側者多矣公澹居其間時論益貴之直翰林
章獻太后修景德寺近璫羅崇勲護作既奏功詔公撰
記崇勲信幸用事遣親密謂公善為記叅知政事可得
公已受詔欲辭不可置不為撰崇勲數請終不以進怒
而讒之太后遂出守密州魯肅簡公在中書爭之不能

留至州太后語中書降勅趣奏記乃上屬東京旱薦饑
先除公田之租數千石遂請悉除京東田租弛鹽禁使
民得賈海救荒束人於今賴之皆曰活吾人百萬口蔡
公也公前知臺雜事復拜中丞正色立於朝權戚干憲
度必彈劾未嘗及諸細也章獻太后遺制以莊惠繼垂
箔叅聽閤門白臺促百官入賀公毅然顧吏無得追班
前白二府天子春秋已長太后未命非天下所望抑未
有聞於前代者惟執政圖之故莊惠但稱尊宮省號保

慶太后不復預政壹王體正國命公有力焉及登西府
向時房闈專威閣謁依藉因是以習典刑猶紊公持重
據正意在杜邪撓以贊平康之治嘉謀嘉猷入告為多
然性靜密未嘗語於私故幾微啓沃莫傳焉衆所共聞
者著一二云爾景祐初中宮虛位有自細微因莊惠以
入掖庭得見中意將遂正位號大臣並諍而公尤力既
而欲以備嬪御公獨堅請歸之因得高選勲閥上儷天
極王蒙正者連姻外戚子殺人謫徙未更赦中札命樞

府復官公謂同列始初清明宜謹國章旦朝以聞寢之
或曰小事惡足煩上公曰德刑治本人主以為操柄殺
人而以官免免死而復官是殺人者無罪也斯之為小
將奚為大退為奏明日懷以授樞密使王文康已朝奏
事且退公前曰王某向與臣議更有奏請文康不得已
白之上意不回公曰法天下之平而撓以私且亂政刑
又命降官一等固請而止樞密院有直學士題名錢惟
演撰記希丁謂意獨黜寇忠愍公逆準不書示懲惡也

公建言萊公忠義有勞王家茲實厚誣以疑後世請而
別去其辭南徼蠻酋虐用諸蠻奔宜州自歸八百餘人
議者請勿納公曰蠻逃殘酷歸王化以求生處之湖湘
曠土足使自給却之勢必不敢還聚散山谷為盜從而
戮之蠻亦人也酷又甚焉不果納既而潰為民患至殺
將吏宜桂以西皆擾朝廷方悔契丹徙帳幽州屯鄙上
邊戍繕完赤囊押至二府並請增守備宰相呂申公對
上決策勿與保無變異論猶藉藉公議協遂定鎮靖有

體人情安安河決橫隴朝議隄塞公曰水趣下河朔地卑順而導之可免澶滑壅溢德博數州得在河南於國家便但護魏為可從之澶滑迨今無患仁宗景祐間朝廷尊嚴治平又安是時在位為多正人周頌云無競惟人四方其訓之不猶信歟寶元初夏戎叛命公在潁州聞之以為戚念時任事者慮害不能深俾弟稟入言西邊事於朝甚詳稟因論次其說條類成書號通志時亦多施行者本公志也公資忠信器靜深不矜而莊不厲

而威直方而有容內文理而外溫厚非義所存不接於
心術不恃高論不為詭行施諸已而不願不以施於人與
人至誠重然諾一言之出終身可復樂道人之善推賢
達能惟恐時之有遺才也性謙退不伐執義堅固臨大
節有不可奪之守在朝廷惟日孜孜以思納君子善身
處外乃心無不在王室故士大夫倚公以為當世重焉
中年而薨天下莫不痛惜以其才之未究也嘗謂名教
治之本孔子之後襲文宣公舊矣乾興中四十九代孫

承祐卒絕不襲十餘年公援漢元始故事上言聖人之
嗣不宜久廢承祐有母弟在請續封詔從焉尤篤故舊
死生不以易其操初馬絳調萊州判官與公為忘年交
公除御史中丞被旨舉御史以絳應詔故相王文穆公
隨守泰州絳通判隨政事多僻絳剛正每執不阿以大
忤隨至是文穆當國持奏不下公請政府曰舉所知無
易絳者不下請罷舉隨不得已絳除殿中侍御史鄉賦
時州掾賈編考試公在宥密編老滯銓集公請解一官

為編改秩仁宗嘉其意擢編朝籍與彭城劉顏布衣友善顏積學有行誼然罪廢不可復振公為解說其情稱所長於朝錄其所著書上之顏以縣尉謫至是起授泰寧軍節度推官時近臣多薦文藻之士充館閣員公獨薦陸參有古學將召試公為請曰詩賦非參所工欲觀其學所著蒙書在焉參特召充館閣檢討公篤義雅正不撓權倖類此范仲淹龐籍劉隨楊偕郭勸皆公推轂以顯於時事母楚國太夫人張氏色養無違公薨楚國在

堂士君子傷之其配中山郡夫人劉氏三子曰延年將
作監主簿早世延慶今為尚書屯田員外郎京東路提
點刑獄材敏而文有遠度亢蔡宗者也延嗣大理評事
精爽似兄好學不樂仕長女適太常博士劉庠顏之子
公憫顏志不遂庠幼孤即以女妻之次適某官某生男
冠平早孤保於外氏楚國特愛之故公視猶子公薨子
幼凡喪葬底家事悉屬平平厚重君子也今以太常少
卿直昭文館知鄭州公守南都某以舉子見厚蒙器賞

故我以國士報之於此文也銘曰在仁宗朝廟堂名公道德之純蔡公文忠公之為人性乎仁義用中為常不勉而至發為忠孝於君於親施於百行於以誠身有如珠玉稟於純精亦如金石中含和聲又若水火之清之明又若山川之秀之英乾坤之體其用簡易賢人德業久大以類我不為善亦奚以伐我弗為高則將焉越雲上於天其潤在下公心所存可求諸野施不為名報不在壽誠以自成茲則不朽惟公之道以誠始終豈復可

味一氣是同凡此陳迹公之宜祀揭此銘章孝子之慰

朝政大夫贈禮部尚書天水趙公神道碑銘

并序

夫積善垂裕命曰慶基揚名顯親斯為孝範故世家濟
美流光本乎德厚朝廷著令命秩行乎追錫所以褒明
教忠之懿懋勸事君之節人倫國體於是備焉茲太宗
伯趙公所以沒世而道益光也公諱某字某自造父受
封趙城而叔帶有後晉國成宣之勲簡襄之業列於諸
侯十有二世而并於秦秦使王嘉之子輔主屬西戎實

得我心號曰趙主漢高祖入關輔率諸戎以從因家天水營平侯充國蓋其裔也唐末自河朔徙睢陽之虞城追公七世宋人矣曾王父某含章篤行見宗鄉閭府聞於朝署州司馬邑鄉名數始為士族王父某允蹈吉德敦守節誼博考典訓推為醇儒諸生來學遠傾齊魯時宰薦其經行召入成均助教歷五經博士考某傳家學通春秋五代晉漢之際遭世多艱知志不遂選除平陰南華楚丘令仁恕愛利惠綏百里官不遠其桑梓示祿

仕之意也迨公通籍贈太常丞公局度沈邃體裁莊和
臨事發揚殊更彊毅年十三常自平陰迎外王母於譙
路逢羣盜徒御駭散公下馬叱咤辭氣甚厲盜愕相顧
壯其少而勇且仁平陰之政歸所掠而潰家雖治經專
於六藝公既該貫則以學文購致太史公記兩漢書南
北朝史文選諸子集悉手自寫讐考詳正時中原喪亂
篇籍亡缺及是梁宋間始傳善書具全本逮今家藏子
孫寶之河東柳仲塗為宋督郵名高使氣士子罕通者

獨接納公與定交契輝光聲問由是寢遠太皇纂極崇
儒右文初御便殿親策貢士公不預奏籍慨然曰英主
可自託也錄所著述獻書闕下文奏御上知有司遺才
也特召試賜進士第調鳳翔司寇叅軍府按重辟具獄
上且論殺公發疑狀果囚誣服凡決獄事多所平反上
官薦其材高驛召至闕遷光祿丞領梓州權鹽院制貿
遷之法操其奇贏不設峻防大儲放利加佐著作通判
密州時騎寇仍入北邊嚴警戎備籍夫兵於山東州將

據版圖取捨失平民大譁趨攻牙門將發庫兵作難公挺身出慰解衆釋伏指刺史廷曰吾屬特不忍公不然茲流血矣已而推戮其造端者而郡以全朝廷聞而問故公曰吾可以為已功而不分謗也乎竟不自言受不覺舉坐徙倅縉雲又徙新定俄以太子中允知洋州淳化中盜起青城陷成都絕閣道王師循褒梁入討興道當其衝發輸期會絡驛星火僚屬謂公利害在民功過屬身公行不忍將有稽乏公曰州縣之命繫吾是賴操

切取辦以圖賞利吾不能也由是左授南陽監征公慘
怛愛人之心大指類此在南陽故參知政事蘇公冠忠
愍公並繇執政臨州以公老成待之上賓禮意甚至皆
謂公長者也章聖登阼除國子博士尋以尚書駕部員
外郎提點江淮茶鹽賜五品服章遷比部顧謂子弟曰
知止不殆豈惟富貴者然士之常爾今吾告朝以老歸
爾以事將安性復命佚吾餘日族人故舊或謂公未嘗
立產業基趾退身安之乎公笑曰吾惟平生家無長物

儻是之念則漏盡夜行莫攸息已章再上得請改駕部
致仕行過山陽郡舉子王生駿見公於傳舍高公清節
為買宅一區田一壥遂留寓於山陽竟考終於此第
享年七十二駿後貴顯至樞密使云夫人清河縣君張
氏後夫人渤海縣君高氏淑明仁順德禮允諧子七人
曰常固曰盤曰集曰明允曰棐其一未及名率循素業
無所成名而卒最幼曰槩閔大冲遠純粹疏通發策甲
科躋華近列今為翰林學士知制誥踐歷臺閣為時名

卿自司馬仕州佐至太常三世皆以道義忠信沉晦微
下公年知命方解巾從仕盤桓恬尚卑不可踰凜凜
然有德讓君子之遺風識者固知其後必大素履終吉
成於翰林故公累贈兵部郎中諫議大夫給事中禮戶
部侍郎春官大宗伯詩云君子有穀詒厥孫子春官之
謂歟無念爾祖聿修厥德翰林之謂歟翰林掌綸西掖
渤海就養北堂上郊園丘均恩著位請迴勲爵錫母邑
封詔旨特允封渤海廣陵郡太君因追贈張夫人汝陰

郡太君既而廣陵即世翰林去職柴毀孺慕哀哀罔極
始自山陽奉公帷裳歸葬虞城之天巡鄉二夫人實祔
焉誠信克終哀榮並伸刻石新阡用揚顯仁惟嘗僚且
同里宜傳信於斯文銘曰有唐毀頽五季積衰小雅盡
廢中國道微先儒訓典不絕若綫博士循循師門獨闡
楚丘沈默埋照屏飾猶有社稷尚優執翟迨公策名式
遭王明初掾于岐察獄以情州將失民致戎於門為公
投仗自消厲氛國兵入褒發輸火急公委州符洋人相

泣仕不為身造次惟仁明水太羹澹乎潔純引年退迹
篚無餘帛以道為歸匪家之戚四世一心貽其德音積
善有基爰啓翰林翰林疊疊維實是似履道孔夷宜必
儲祉慶流湯湯顧後寢昌絳服纁裳公享祿章

宋故密州管內觀察使金紫光祿大夫檢校工
部尚書使持節密州諸軍事密州刺史兼御
史大夫知汝州兼管內營田堤堰橋道勸農使
兼汝州兵馬總管上柱國河間郡開國公食邑三

千五百戶食實封六百戶贈昭德軍節度使謚

惠節向公神道碑銘

并序

周封微子於宋春秋時公族諸桓有向氏賢卿大夫不
絕書中稍微皇宋誕興向氏從盛真宗皇帝考慎厥
相有若魏國文簡公諱某謨明弼諧緝熙百度翊隆盛
業治致昇平勤勞王家書伐國策以尚書左僕射門下
侍郎位居元宰公其幼子也諱某字仲模初以任令起
家衛尉寺丞娶冀康孝王惟吉女萬年郡主改內殿崇

班王太祖皇帝之寵孫恩禮絕等歷太宗朝未就外郎
故主長於禁中真宗有旨為擇嘉耦以公才地兼美選
配焉既席世家又聯戚里涖官典職常處親近自祥符
至皇祐三年未嘗違京闕累官至四方館使榮州刺史
始出知相州司空僚佐意公未習為吏易之而觀其所
發及視事知體要奉法循理舉措時當人情莫不厭服
治有聲遂著材望日益顯重遷果州濰州團練使解州
登州博州汝州防禦使密州管內觀察使歷守恩邢陝

滄保澶鄆潞汝凡十州正身戢下凡家所資率致自京師以行至官所約閫以內不得與外通貿易餘祿輒以均諸幕府掾屬凡官什器不入於家所至以為常日孜孜思所以為惠利者勤而行之惟恐一有失所者知州縣之事賦役為本監司或以權便違令斂發不以時傷財害民必守常法酌下情俾公私各得其宜體安而理和故操事者樂於聽改而吏民實蒙其惠政平訟審獄市無擾民得職上課數為一路最重宿望或更出其下

異日貴侯近戚之為郡者飾苞苴事厨傳已則弗率而求容於刺察之官救過之不暇於庇民乎何有以是百姓重傷景德之後隣敵請和河朔不用兵且六七十年邊無興調耕桑安業宜乎樂事勸工家給人足而比屋屢空鮮有蓋藏非由官吏侵漁不恤而然耶如公者保而牧之則老稚鰥寡庶乎有以養矣其在滄州蜚蝗蔽野官督焚捕而無所施其力有鳥羣啄之委之塋壠故境內不告災乃以有秋見者咨異歸德於公謂其仁心

有以召之者其解郵父老請留於朝以千數止之莫可
非慈惠有以懷之衆心雖令孰從焉自天子至於公卿
大夫皆以其才為可任不以恩澤遇之出守陝郊仁宗
御賜詩寵其行又嘗暇日援神筆書其姓名因以賜之
蓋有以簡於清衷者矣文簡餘慶寢以蕃衍公於宗為
長若親屬吉凶艱乏之事撫存周急恩意均至諸仕宦
於四方死喪在遠久未克葬者日月益多公積俸累歲
并萬年主脂沐之賜貲千餘萬計足以集大事一日請

於朝諸族人之在外官者會於京師凡舉六十四喪合
葬於魏公大塋之次中外莫不高其義茲固有以厚風
俗美教化豈但施乎家人之道也哉治平中英宗皇帝
為今上納妃於向氏命公主嘉禮禴翟羽儀率由先
典上登宸極爰正中宮乃今定國軍節度使觀察留後
經之女魏公之姪也公糾勵宗門尤自抑畏蓋居家理
故治可移於官位不期驕祿不期侈非守之以禮行之
以義克保令名夫亦鮮哉歷官自內殿臣制五遷至西

京左藏庫使東西上閤門四方館使多由課陞間因才
舉罕以年勞叙進也歷職事奉輿輦典軍器帶御器械
翰林引見皇城司三班院會靈醴泉觀三使戎廷十主
蕃客國有大禮若大故必預焉自潞州以使歸闕便醫
久之良愈復知汝州遂薨於官下享年六十有五熙寧
七年七月十八日優贈昭德軍節度使聖上愴悼命護
其喪還京師三宮遣內宗臨奠恩禮殊渥即以十月某
日就窆豐臺之原奉常按狀上議以為公典十郡有

惠政人安樂其治所至以最聞不以富貴驕人斥已之
餘以賙宗族臨民不撓行潔清故舉謚法愛民好與曰
惠好廉自克曰節合二法以易名焉公資愷易謹密和
而有守出入禁省金璫綺襦羣居並游挺然中立亡親
疎之迹善與人交篤於風義長於治民知簡易之體不
忤不求亦何用而不臧矣曾祖某祖某烈考相國並
贈太師尚書令兼中書令進封許曹魏三國四男續
內園使繪贊善大夫早卒繹西頭供奉官總右侍禁四

女適比部郎中劉宮皇城使曹諶國子監修撰經義檢
討練亨甫次在室孫十一人銘曰穆穆厥聲湯孫多仁
王子出迪為周室賓支別自桓有邑於向邈及皇朝
始出將相顯允魏公文武惟憲弼亮昭辟篤循大卞德
厚流光乃終有慶公承其休世家以盛始繇任仕亦緣
戚恩爰及莅官則以才伸行既信厚資復安重職近地
親並彰諸用帝曰汝器才譽允穆曾是好德爰錫之福
試之治民所至稱治民罔常懷懷於愛利不矜而嚴不

苛以簡古之惠人道豈云遠義敦於族存亡以篤行成
乎身有嫺風俗駕言徂汝宗姻出祖素蓋遄歸號迎於
路作善降祥所享奚嗇吁嗟旌旄乃以追錫奉常考功
表之節惠沒而不忘流徽永世國門可望豐原故林勒
銘樂石式昭德音

宋故端明殿學士金紫光祿大夫行工部尚書
致仕上柱國太原郡開國公食邑三千八百戶
食實封一千二百戶謚懿敏王公神道碑銘

并序

公諱素字某其先大名華人曾祖五代唐莊宗時左拾
遺祖國初以尚書兵部侍郎知制誥始家京下著籍開
封考以太尉相真宗並贈太師尚書令兼中書令封魯
晉魏國公景德祥符間天下無事生民安樂功成垂統
號稱太平太尉位居朝首執其政柄故生極隆名歿而
從享於廟為一代之宗臣盛矣其薨也章聖問諸孤公
猶未官更以嗟惻始授太常寺太祝服闋特遷大理評
事召試學士院賜進士出身復召試擢通判潁州更懷

州許州三遷太常博士近臣薦其材高復召試賜五品服凡三試禁林當登館閣之選每以大臣親嫌見抑出知濮州年尚少下觀望有大姓倚要人橫猾公彈治竟法吏民聳懾政有能名河決始復故道轉運使按瀕河之田檄郡縣增賦公上言流散方歸正宜保息特詔無得增賦自濮七州之民皆被惠秩滿領宣州未行御史中丞孔道輔舉充侍御史未幾道輔外補公亦出知鄂州荆湖一道配民率口鬻鹽公持利害不從鄂人獨免

徙宿州慶厯初夏戎阻命契丹來渝平仁宗格以至誠
隣敵自懷益修政事首增諫員召公自宿知諫院同判
國子監悉情獻替多見嚮納皇子生將大慶賚公曰西
師尚嚴勞臣在邊士苦戰戍之勤民疲賚送之役而金
帛散於不急爵祿加於無功慶賚非宜朝議為止論天
下貢士不得才行之實請罷糊名以取誠士論郡國置
學校擇師官以漸復里選之法論中書凡中外奏事不
即裁定輒下近臣集議蓋執政者莫肯任咎為此紛紛

由是集議稀濶論請置官三司會校國計省諸冗費以
不訾仁宗間御天章閣召二府出手詔訪時務公因列
疏闕政十餘條皆人所難言者他日帝坐延和殿特召
賜三品服尋遷天章閣待制領淮南都轉運按察使時
初加按察之名以假司官之重奉使者率以苛峻為稱
職公獨處之以平易惟貪暴吏莫容焉故常更易貳稅
致羨錢上供以自為勞公徹其敝朝廷聞而善之舉以
戒諸路就遷涇原路經略使知渭州有操權者不悅公

伺釁危之河東轉運使因事被劾辭有及公者坐徙華
州按推者與公薄親而不以聞又坐是奪職徙江州未
至改汝州徙潞州丁太夫人袁氏憂服除知兗州還待
制復知渭州就拜龍圖閣直學士還領三班院遂除樞
密直學士知開封府至和二年仁宗不豫內外憂恐秋
大雨水蔡河堤壞墊安上門漂沒軍民廬舍中旨遣馬
軍帥范恪塞朱雀門公密啓止之衆心以安公白今茲
惟宜鎮靜精察姦盜爾故獄市無擾京下肅然於時識

者謂公處動危時得體閱歲遷龍圖閣學士定州路馬步軍都總管安撫使知定州尋除翰林侍讀學士知益州益部會府宴設歲費為錢數千萬取給牙校習以為常公為裁節所損幾半川峽用鐵錢諸鑪歲課嘉邛苦之公請停鑄而貨幣以平關市無乏漢中饑遣賑廩而後以聞朝廷適議揀恤而奏至見謂適便宜公臨下以恕簡而易從條教明審人情安便故西川之政蜀人紀之代還復知開封府嘗建請置使院判官主賦役之政

令置八廂官以決小罪置發故司勾朱官以檢稽違後
皆施行稱便久之請解領羣牧使請補外知許州英宗
初羌入平涼塞連犯堡塞朝議擇帥謂無易公者除端
明殿學士復知渭州邊人聞公至曰無事矣羌積服公
威信即解散既下車境上恬然公三帥平涼御將卒有
恩闊略不苛急人皆樂為用臨事毅然不可犯也時謂
三邊統率公稱最初在平涼部將蔣偕築堡境外為羌
要擊問道竄歸公貫令復往訖役總管狄青曰偕往必

復敗公曰偕死君行矣偕知不可徒還故以死就功而
堡竟立有番官密悉天水羌也粗有計略羣羌所信前
帥欲羈縻之請以為諸族巡檢事下公議公數其罪械
送本道中路亡去諸將請重購之以絕後患公曰是烏
足以為者不購亦竟無能為一日方燕饗邊民驚譁奔
入城將佐請闔門防姦變公曰妄相恐爾寇至吾不知
耶傳令敢妄有言者斬俄而自定衆服其明決西陲諸
路內屬番部因事質留者有至老死不得出公閱其籍

情非甚惡而繫久者戒諭散遣之莫不感悅弓箭手邊
勁兵也先有千餘家在境上無城柵寇至莫自保公築
八堡分處之老幼感泣曰自此有生計矣舊事弓箭手
人騎分領於東西路巡檢公曰是屬官但給田使自衣
食聚而役之是廢其業趣使就耕有警則發之故戰士
競勸懷於自効拓州之西南城濬隍三周無慮二十萬
工而民不知役渭人刻功於石畫像於祠改澶州廉察
知成德軍真定府路安撫使太原帥缺上頤謂輔臣河

東節制四路其議宿望以行柄臣以公應詔復端明殿學士遷尚書左丞河東四路經略安撫監牧使知太原府汾河暴溢命築諸隄防之缺曰匯平晉勢必及郭既而水果至不為害年大赦發公私粟蠲諸賦救荒之政甚設民皆獲濟還朝知通進銀臺司門下封駁事以疾請外補留提舉醴泉觀復請知汝州歲餘疾稍侵遂請老以工部尚書致仕繇博士及此凡歷尚書省員外郎郎中侍郎並三遷中間除諫議大夫給事中澶州青州


觀察使尚書左丞而以冬官老焉故事致仕雖三公無
兼職者朝廷初立親制公首以學士就第公宰相子自
勵學問潔操行與游皆時俊故朝論不敢以世家子弟
等比臺省清要官缺物望必及之資尤勁善談論及為
御史諫官論事上前不撓權勢不顧嫌忌稱為敢言侍
讀經閣至於前言徃行必精切開說因以諷勸仁宗常
命公悉上御史諫官時所論事間省閱之盖有簡于上
心者深矣晚之涇原英宗面諭曰朕知學士久矣邊有

警其勉以行且及進用意公還在道英宗疾大漸猶問
輔臣王某至何所公至會英宗上僊遂赴真定上亦舊
聞公名其往汝州謂之曰汝非卿所宜處從所便爾性
愷易無城府善與人交久而彌篤早從公游及所嘗獎
薦至於幕府文武間登公卿或至將相而公處之自如
也熙寧六年三月甲寅薨於京師享年六十有七上聞
為輟視朝奉常易名曰懿敏公生長富貴及解紱私第
葺虛齋悉屏平日玩好陶器野服放懷方外至於啓手足

神志不亂泊然怛化五月庚申歸葬文正公先塋文集
二十卷藏於家娶李氏同安郡夫人禮部尚書維之女
滕氏安康郡夫人給事中涉之女張氏永嘉郡夫人太
傅士遜之女九男厚將作監主簿早世固大理評事堅
光祿寺丞輩本碩大理評事凝秘書省正字常輿將作
監主簿二女適將作監丞李祥文居中僕與公義兼姻
友故得詳為紀述後之載筆者有以傳信於斯文銘曰
宋有賢相太尉魏公昭事乃辟於變時雍公其才子祇

服是似泱泱大風德音載躋惟國之良於朝有光令問
令望金玉其相御史諫官世家鮮處帝曰惟才獨蒙察
舉不將不迎直躬以行思我王度尚有典刑國之重防
守在三邊公秉帥節于蕃于宣卒乘輯睦農狎於野赤
囊弗馳壺歌以雅英皇有言公余舊知圖任共政既面
命之召自平涼綴衣已沒攀胡靡及朔門復輶巖廊訃
謨匪咎匪誅時莫我與將誰不如汝海之行依依懷止
駕言于歸遂致君事幅巾虛齋蕭然遺照回閱平生恍

如夢覺人生而靜泊湛諸情公將北首靜如厥生聖人
貴真真謂性命公平庶幾知終以正



樂全集卷三十七

欽定四庫全書

集部

樂全集卷三十八

詳校官庶吉士臣龍廷槐

檢討臣何思鈞覆勘

總校官中書臣朱 鈐

校對官中書臣吳 俊

謄錄監生臣楊兆豐

欽定四庫全書

樂全集卷三十八

宋 張方平 撰

墓誌石記文

贈賢妃俞氏墓誌銘

并序

國朝憲章古制叙建內官上法天極以正四妃之位外
沿卿職而修九嬪之教所以順承后治變諧陰禮品儀
異數備存甲令謹按贈賢妃俞氏仁宗皇帝昭儀也吳
越著姓世仕藩朝曾祖承遜女為錢忠懿王俶夫人從

倅歸國終於睦州刺史祖仁祐東頭供奉官閣門祇候
父振左侍禁妣陳氏贈東海郡王洪進之孫女良奧成
家善祥保世慶鍾邦媛光膺天福景祐中海寓熙寧帝
臨御已久而堯門未啓甲觀尚虛妃早序金環之渥首
當彤管之記三年就館始生皇子太師宣銅律之和詞
臣獻郊禋之賦燕朝稱賀未舉慶觴柘館不留空遺文
祿追賜名昉封褒王魏王復贈懷靖太子今封周王越
二年生皇第二女號崇慶公主四歲亦薨追封楚越國

今贈唐國長公主妃以載誕承恩始封延安郡君進拜
美人婕妤充儀昭儀贈其祖右屯衛將軍父右領軍衛
將軍妣京兆郡太君錄其弟祐之東頭供奉官祐成左
侍禁諸姪皆登仕麗澤及宗榮陪戚里仁宗享國四十
二年抑畏持盈始終如一中禁位號不必備惟其人高
華洵淑登六儀之列者無幾亦可知其選也昭陵發引
號慕以從復土還宮結款感疾治平元年六月薨享年
四十有四上惟先帝諸嬪之舊悼賻有加榮贈賢妃用

優典也命楚國保寧安德夫人景氏主喪禮宣慶使安
靜軍節度觀察使入內侍省都都知任守忠護葬事
蒞塗於開聖尼院以十月二十二日就窆窆於奉先資
福精舍之東園鹵簿儀仗率從其品初妃年八歲以選
合法相入充掖庭笄總韶秀慧心警敏夙被傳姆之訓
旁漸公宮之學輦悅組紉音奕書繪耳目經涉妙通多
藝嘗請國子監書籍特蒙給送以資繙閱玩味圖史摘
辭挾麗時獻歌頌雅承賞激雲章宸制輒賜屬和授毫

賡進不移晷漏數捧神筆侍為飛白退而灑翰亦習工
焉康定初夏戎叛命西師在野請減俸賜以贍興費後
邊患息還給本秩堅求停罷又昭儀歲久屢有恩旨叙
遷遂巡遜免竟不成命初拜充儀特賜冠衣盛服積而
不敢御也至是舉以祿焉在寵不驕持謙自牧四德之
懿知其有人特詔近臣俾刻樂石非惟漏澤泉扃傳芳
內則蓋亦示美化於家邦本徽音於椒掖謹系之銘曰
泰一常居後句四星爰叙內則承尊紫庭先朝謙儉位

號尤鮮惟德肅雍式登於選有婉賢妃垂髫英妙好事
圖史亦絢華藻見禮襟庭帶以弓韞如榮黼幄錫之冠
服心無傷善志存憂國諧我雅風允穆嬪則龍駕上賓
鸞旂西御青蓋莫留素帷永慕文明繼統慈壽開宮方
承渥惠倏閱音容掩櫳箔兮遂無還就幽窆兮祇園悵
流景之道盡撫絳紗兮尚存辭栢城兮東返懷舊恩兮
未遠侍玉衣兮下宮往言歸兮何恨

秦國大長公主墓誌銘

并序

秦國大長公主仁宗皇帝第九女也母曰淑妃董氏嘉祐四年四月二十五日誕生嘉祐初仁宗違豫淑妃奉侍勤瘁帝心察而憐之眷遇甚渥故主愛亦隆五年封福安公主八年英宗纂御進封康國長公主治平四年今上踐阼加號鄭國大長公主閏三月二十三日薨年八歲主雖妙齡地居尊屬在仁宗有允女之寵於英宗處天妹之重今上當太主之貴而太皇太后盡鞠育之慈皇太后敦諸姑之好可謂生而極盛榮之至也主既

終三年之制復值大行之恤性資純孝情深攀慕日課
佛經間或蔬饌積毀癯瘠感疾遂侵三宮軫懷日就臨
問親省醫劑奄然無瘳美玉韜華明珠晦色琅函金簡
應圖牒以暫來喬雲景星見光靈而遽返中闡傷慟
掖庭哀送四月二日菽塗於奉先資福精舍上為輟視
朝五日追祔秦國大長公主秋八月從英宗皇帝龍輶
歸窆昭陵外域別用鹵簿儀物以從蓋舊禮也有詔近
臣刊辭樂石銘曰月渚仙娥星潢帝女周美天妹漢尊

太主初解文祿承嬉紫房穠華鳳彩秀色龍章素瑟未
工玉簫方習黼幄愛隆雲輶迴急三宮慈渥五陵神輿
逝不可留吁嗟太早

皇叔祖推誠保順同德亮節崇仁守正佐運翊
戴功臣寧海平江等軍節度管内觀察處
置堤堰橋道等使開府儀同三司檢校太傅
守太保兼中書令杭州大都督府長史使
持節蘇州諸軍事蘇州刺史上柱國襄陽郡

王食邑一萬五千四百戶食實封五千戶贈太

師尚書令兼中書令追封定王墓誌銘并序

王諱允良字公彥太宗皇帝八子而燕恭肅王最幼尤
寵焉章聖緣先帝意友愛加厚久不就外郎故以大中
祥符六年生王於東宮母康國太夫人劉氏天禧四年
先王為言能勝衣趨拜一命右千牛衛將軍方八歲越
二年仁宗踐祚遷大將軍舒州刺史天聖中始預朝叅
解將軍正授泰州刺史俄除潁州團練使徙單州明道

二年天下乂安朝廷講稀閑之典劭農務本帝躬籍於
千畝王預九推之位禮成覃慶遷鄭州防禦易蔡州陪
祠南郊進安州觀察使久之改鎮國軍節度觀察留後
慶厯元年景至大祀圜丘王備終獻陟降惟恪四年恭
肅王捐宮寢仁宗深惟祖宗基統之重蓋吳潭太祖之
昭也潞許邢潤蘇華燕太宗之穆也至是薨謝無存者
思盤維之重慮深長之本始議崇建戚藩以屏王室於
是以華原郡肇啓王封既而拜安國軍節度使皇祐二

年冬祀明堂帝奉玉幣既交於上下神祇慨然嘉與天下均受靈貺推恩中外加中書門下平章事換鎮江軍節旄至和二年檢校司空領泰寧軍節度嘉祐元年行恭謝之禮王陪祠登獻七年祫享太廟除開府儀同三司兼侍中彰信軍節度八年夏英宗纂御王以叔父之尊檢校太保兼中書令泰寧軍節度改封襄陽郡王治平四年春宮車晏出今上踐阼王久苦末弱猶能力疾趨入盡號慕之哀真拜太保杭州大都督府長史寧海

平江等軍節度哭而出疾遂篤尋有中詔俾朝朔望以
優尊屬甫逾月而薨王姿表粹美氣質溫厚服寵四朝
惟一心仁宗之仁周於萬物而仁之所施常自親始肆
其眷待宗室恩禮隆密朝政之暇佳辰令節合族綴親
讌於內朝如家人禮王於天屬至近行純而節和故被
遇為渥賜以御筆飛白書王既刻石以進則徧錫公卿
近臣嘉顯之王好修威儀矜莊自喜燕居裕如也趨朝
肅如也侍祠恪如也性寬易左右侍御小過失未嘗譴

責甚者詰之亦怡而弗厲久於其側者莫見愠色永嘉
郡王王之仲弟也其子宗粹早孤王撫育如所生王既
薨宗粹請服三年議者因以嘉王之仁心長者頗好篇
詠感物吟諷時有風味佳句俸賜厚矣未嘗有畜也府
藏出入未嘗披其籍亦不問其在亡國朝之制不屬宗
室以吏事優其祿秩異其寵章列郎京師以奉朝請為
選儒學士切磋講習廣之道義而已所以篤親親之恩
不使任責惇叙糾合別於庶姓者也然間有蘊才業抱

器慮者不偕於用齋志以歿故執冊者無得而書不然
屬籍之功名豈直漢唐之比盛歟治平四年三月二十
六日甲辰薨享年五十有五訃聞天子趣駕欲往臨哭
有司言大行梓宮在殯而止輟視朝五日成服於苑中
文武班慰於崇政殿門贈太師尚書令兼中書令追封
定王閏三月甲午菆塗於正寢之西楹八月癸酉英宗
龍輅西引從葬於河南永安先王之塋英國夫人張氏
祔焉夫人橫海軍節度使贈太師尚書令美之曾孫女

果州團練使士宣之女子八人宗絳右龍武軍大將軍
郴州團練使宗蘭右武衛大將軍台州刺史宗劼宗易
右監門衛將軍餘早世女八人曰金堂縣主普寧嘉興
延安安定同安普寧郡君皆已有適其一幼孫七人仲
竣右監門率府率早世仲蒼右監門率府率餘皆幼遠
日有期奉詔紀實銘曰太宗之穆燕為寵王恭肅之愛
亦鍾襄陽體自天人虎蔚龍章肆得靈稟敦和以莊勝
衣奉朝雅有嘉問寵章麗澤康侯以晉迺啓華原薦更

四鎮旃旆綏章兼綰相印迨事四朝屬尊位崇歷長三
省沆登上公并帥全吳兩藩之雄別建赤社江漢是封
有宋開基百年光大極盛積隆德周無外重仁累慈恩
光治內王生得辰與國同泰帝坐路朝一日萬幾昧爽
丕顯居安思危王居深宮以燕以嬉五十五年始終盛
時王享多福四朝盛德亦惟淑慎錫汝保極嵩洛佳
原五陵接域徃從先王返此幽窆

皇從弟故推誠保順翊戴功臣安靜軍節度使

梓州管内觀察處置等使金紫光祿大夫檢校
尚書右僕射使持節梓州諸軍事梓州刺史
兼御史大夫上柱國天水郡開國公食邑六
千六百戶食實封二千一百戶贈太尉追封

永嘉郡王墓誌銘

并序

王諱允迪字德謨燕恭肅王之第五子太宗皇帝諸王
恭肅最幼鍾愛焉章聖嗣服緣先帝意加親寵故久不
就外郎大中祥符甲寅歲生王於東宮天禧四年遇承

天節始賜名一命為右千牛衛將軍今上踐阼推恩內
外褒進戚藩以翼王室除大將軍領和州刺史久之罷
將軍改崇州俄拜唐州團練使明道元年宸居落成肆
大書徙濟州躬藉千畝王預九推之位禮成均慶遷汝
州防禦使進靜難軍留後慶厯四年制授安靜軍節度
使蓋恭肅王嘗領是鎮而王繼焉宗藩榮之是歲先王
捐宮寢聖上慈仁誠孝至性自然寅畏天地虔恭祖考
博睦族屬以御於家邦嘗欲以是風天下納民大順恭

肅之薨也以叔父之重悼恤尤深而王執喪有不及禮者降授右監門衛大將軍克自修省循禮謹度尋改密州觀察使六年復安靜旄鉞王素康盛至是感疾良美中貴人挾上醫診治內出黃金劑以賜撫訊相及於路疾遂革慶歷八年三月己未夜漏十刻以不起聞享年三十有五上聞震悼厥明輦如其邸哭臨之廢朝五日丁巳上成服苑中文武班慰於崇政門遂以太尉章紱追封永嘉郡王凡賻賜率加等焉太常節惠謚曰思恪

詔大鴻臚持節典喪事四月癸未塗葢於寢易官以窆
事令龜先遠日維六月癸酉吉未引紼宣徽北院使李
昭亮辭赴三城故事置餞酒於垂拱殿以王在殯為之
徹樂五月甲寅具鹵簿鼓吹麾幢旄節導輜以西葬河
南之永安六安郡夫人張氏祔焉夫人德象婉嘉壺闈
之範載命不淑方華而殞繼室昭國夫人錢氏忠懿王
之孫女志尚清淨不安其家懇請遜於洞真宮遂賜道
士冠服名曰修真號和正大師子四人曰宗粹右監門

率府副率三皆夭逝女七人長早卒贈江華郡君次並
在室王姿采秀發氣志果勁性開敏豁如也涉獵書史
略通大義留思篇詠風體爾雅曉音律善射命中得和
容之妙國朝之制不屬宗室以吏事悉留京師以奉朝
請若永嘉之果以敏使之從政亦足以發已若夫被化
麟趾承華棣萼靈長憑厚體聯上帝之孫顯重崇高族
系天王之弟昌辰累洽丁慶祚以同安聖度廣容靡嚴
顏之懷懼宴寧譽處生榮歿哀方之前朝王享備矣百

福具有不至者年天實命之何嗟及矣臣職在史觀且
司宗籍承詔誤識敢不直書銘曰訐訐梓潼蜀劍之東
先王相攸實啓榮封帝念叔父建爾仲子續其節旄俾
多受祉仙源懿親詵詵振振祖宗諸孫其在五人克心
舜度仁覆寰宇豈其本支不貴以富胡然乎天不與之
年奄違昌時而歸幽泉吉仗森列悲銘慘絕有祓者車
挽紼晨發嵩洛之陽三陵相望體魄就寧下從先王

左武衛大將軍沂州防禦使贈崇信軍節度觀

察留後漢東郡公墓誌銘并序

平陽懿恭王子十七人漢東於伯仲為第六母曰崇國夫人王氏而漢東乃會稽縣太君黃氏所出公諱宗回字晞聖生九歲賜名授官右侍禁景祐中會朝廷以環衛叙宗子於是以東頭供奉官除左千牛衛將軍累遷至左武衛大將軍沂州防禦使年五十以疾終時治平三年二月戊申也訃聞輟朝一日告贈崇信軍節度觀察留後追封漢東郡公四月乙酉權厝於奉先資福佛

舍四年八月癸酉從英宗龍駕往祔先王之塋累階金
紫光祿大夫檢校右散騎常侍兼官御史大夫勲上柱
國爵開國公食邑三千七百戶真食七百戶漢東儀度
峻整好學隸書曉音律善騎射平居寡言莊色儼如也
有至性年十一喪平陽號踊不自勝若成人者及會稽
歿毀慕癰瘠宗族稱其孝晚年篤信釋法不以世累縈
其心賓祭內外之事屬於其配忘懷委順以遊乎方之
外夫音伎之樂玩巧之好乃富貴之地耳目之所常湛

沒者是之弗由而獨遠離苦集之途庶幾真常之境推其所尚天下一致而百慮同歸於為善而已夫人隴西郡君李氏克勤內則恭順宜家公之所以得不為塵事所嬰以夫人幹家之盛有餘裕也子二人仲革仲洽並以將軍領雅州昌州刺史皆端固修立女三人長適右侍禁李彥明次適左侍禁倪良嗣次尚幼孫三人士縱右千牛衛將軍士憑士鉦並皆右監門率府率孫女八人俱幼銘曰孝哉漢東至性天得永懷二人哀哀固極

薄諸可欲忘懷世界將超於彼自歸覺地知此如幻孰
為延促往從先王維嵩之麓

宗室金紫光祿大夫右屯衛將軍檢校太子賓

客兼御史大夫騎都尉天水縣開國子食邑

六百戶贈潁州防禦使汝陰侯墓誌銘

并序

汝陰諱宗育字德之太師尚書令潞恭憲王之孫安遠
將軍節度使密國公允言之子源深流光胄自太宗國
家篤親親之恩睦於公族天聖二年始賜名以右侍禁

入備內朝稍遷東頭供奉今上躬擐萬幾超拜內殿承制兼視賓護副相之秩尋屬園壇類帝陟配文考乃眷肺腑便蕃渥典於是進加右屯衛將軍賜階金紫光祿大夫列爵五等衍食采地六百戶不幸感疾才三十而歿時康定辛巳秋七月也訃聞上震悼有加申命內司賓內謁者臨弔治喪事遂以潁州防禦使汝陰侯印綬權厝普濟精藍後三年甲申夏四月從燕恭惠王之鹵簿往窆河南永安縣寶祔先王之塋惟汝陰資性溫愿

涉詩書點翰有楷法間喜武戲尤精射御方將承寵嘉
輔熙隆而降齡弗修其命也夫夫人濮陽吳氏故領軍
衛將軍元慶之女封本郡君勲門戚里姿德兼茂子三
人長曰仲堯右內率府副率餘皆夭闕一女亦不育有
詔掖垣俾識幽窆銘曰汝陰綽綽器聚宏博以善為樂
襲寵軒綏敷庭侍祠在宗有儀當鍾遐祉森映麟趾收
神遽已鞏樹伊流陂陀新丘塚石傳休

宗室贈右屯衛大將軍仲考墓誌銘

并序

仲考字晞尹魏恭憲王之曾孫平陽懿恭王之孫右龍
武軍大將軍丹州防禦使宗產之子皇祐三年四月生
至和二年始賜名授太子右內率府副率嘉祐八年英
宗皇帝踐阼改右監門率府率治平四年今上即位遷
右千牛衛將軍五月甲申以疾終享年一十有七計間
輟視朝一日贈右屯衛大將軍權厝普濟佛舍八月癸酉
從大行靈駕葬河南永安以祔先王之塋累階金紫光
祿大夫勲上護軍爵開國子食邑六百戶娶王氏一女

惟屯衛幼而岐嶷長而嚮善方朝廷設官立學以導宗
子於德義而不得遜志進修以成其之才之性為可傷
矣觀其臨終之辭與父兄相反復而愛順之心尤足悲
者矣銘曰幼女稚妻常情在茲逝將去汝云胡不悲此
愛能輕是有剛節獨於父兄咽不忍絕乃其性資知義
所存雖不享年斯明不昏

皇姪孫銀青光祿大夫檢校國子祭酒行右監
門率府率兼御史大夫輕車都尉贈領軍

衛將軍仲郢墓誌銘并序

領軍諱仲郢謹稽屬籍惟太宗皇帝之元子曰潞恭憲
王生密國公允言密公生祁國公宗說祁公男子二十
三人女子二十五人為領軍之兄弟者二人焉蓋疏潤
星潢擢華月幹慶基憑厚昌緒隆遠矣領軍姿貌端秀
性稟明悟始就外傳屹然佩鞬有成人之志嘗侍上射
苑中攝弓操矢得裏尺剡注之體屢中正鵠賜賚加等
復能留好文史吟詠自娛尤喜篆籀二王歐陽筆法掬

達其勢孝友恭順本諸其衷事親婉以從令處子舍莫
有失愛者入朝廷繇賓贊而威儀儼如景祐三年始賜
名授太子右內率府副率慶厯四年遷右監門率府率
以慶厯七年四月二日感疾而卒享年二十三皇帝以
諸孫之悼輟垂拱朝一日祔以領軍衛將軍印綬殯於
奉先精舍八年六月六日從永嘉郡王之鹵簿往窆永
安塋域禮也娶郭氏三子長曰某率府率次曰某率府
副率季未名四女並在室噫稟生如此其粹也憑慶如

此其隆也降年不永是以祿位器志皆未之究也有詔
史官為之識銘曰太宗之穆既蕃既昌祁公之子詵詵
且良洵美領軍翹然而秀貴可躋待不俾以壽崧高之
麓天啓佳城憲園祔窆體魄維寧

宗室故銀青光祿大夫檢校國子祭酒行太子
右司禦率府率兼殿中侍御史騎都尉世
褒墓誌銘 并序

宗室吳潭二郎太祖皇帝之穆也潭康惠王德芳生昭

信軍節度使兼侍中英國公維憲英國生金州觀察使
從郁司禦蓋金州之第三子諱世褒字仲華以真宗朝
天禧己未生明道癸酉始賜名補右班殿直預內朝尋
改右侍禁景祐乙亥遷階銀艾行太子右司禦率府率
視秩國子祭酒寶元中兼殿中侍御史賜勲騎都尉慶
厯元年十二月十三日遘疾終於邸院春秋二十有三
權塋於普濟佛舍越三年歲在甲申夏四月癸卯從燕
恭惠王國簿葬於洛陽永安大塋夫人安氏無子司禦

方雅信厚公族之秀幼知好學涉通諸經善行草書尤
好虞褚筆法略得其妙近事諸皇族鮮出補外官悉留
京師亦不釐務為選儒學官切磋講習外奉朝請而已
此朝廷親親之義敦睦糾合所以別於庶姓不責以事
然間有蘊才慮抱器識者不偕於用齋志就歿故執冊
者無得而書焉銘曰太祖之穆在潭啓封君其曾孫源
深基隆雅重者性粹厚者志言用與才則未嘗試蕭蕭
馬鳴悠悠素旌往從先王永安之塋

徐國太夫人墓誌銘 并序

禮惟大昏之重以其合二姓之好繼萬世之本也矧皇
胄宗子天家之貴其聘納之選非冠冕德門忠孝之族
孰當焉漳康惠王之仲子故侍中英國公諱惟憲之夫
人曰和氏王考諱凝相五代晉位至右僕射太師尚書
令考諱嶧殿中丞母彭城縣君劉氏夫人體質閒淑德
言有度既就壺教稱賢嫺黨祥符癸丑歲嬪於王家事
尊撫卑夙夜匪懈寬和敦約動循禮法丙辰歲英公捐

館畫哭過哀常好文翰通曉音律是後不復治習稱未
亡人誦貝葉書奉金僊之教諸孤幼稚均養如一榮居
二十年上下無間言者乾興初封汝南郡君明道二年
進莒國夫人慶厯丁亥孟春感疾羸茶上遣中貴人挾
鑿診視諸子益購高手療之莫瘳以七月二十一日薨
於寢享年五十有六追封徐國太夫人上聞而悼之賻
恤加等遣內人省其室詔使護喪事為輦塗奉先精舍
戊子六月六日歸祔英公於永安塋禮也男子四人長

從郁終於金州觀察使次從式左千牛衛大將軍彭州
刺史次從湜左千牛衛大將軍循州刺史次從賁右監
門大將軍女十二人長早卒次封齊安宣城懷德廣樂
晉安安定高平仁壽郡君諸季早夭嗚呼夫人其為女
也靜而婉可謂有彤管之法其為婦也順而正可謂有
采蘋之行其為母也慈以均可謂有鵲巢之德用能節
義著於宗戚恩禮厚於宸眷史臣執簡宜有識矣銘曰
展矣英公宗之彥兮猗歟夫人邦之媛兮自我于歸上

下宜之樂只君子福履綏之云胡不淑公不偕老我逾
終身則已壽考云胡多慶於皆克孝承顏無違服我慈
教自公忽兮我心缺兮半甲子兮從於穴兮

宗室右武衛大將軍黃州刺史令稼夫人壽昌

縣君李氏墓誌銘并序

壽昌縣君李氏故右監門衛將軍言之孫故右侍禁棋
之女於今皇太后為外族治平三年八月歸於右武衛
大將軍黃州刺史令稼武衛迺冀康孝王惟吉之曾孫

廬州觀察使廬江侯守度之孫舒州刺史世括之子壽
昌既歸事舅姑如父母事其夫甚恭愿和順之性出於
自然每黃州之講學也承奉尤祇勤輒躬饌以待蓋喜
其良之遜志自修也且曰富貴而能為善吾心樂哉蓋
知內助之益者歟四年五月辛丑以疾終享年十有九
六月己酉殯於普濟佛舍八月從英宗皇帝靈駕葬河
南永安女一人始育黃州宗室之秀而壽昌才德婉淑
宜與之偕老而遽然以逝亦可悲矣銘曰生也猶幻性

也本真幻何延促真不可淪嗟嗟夫人所稟之純惜哉
奄忽以還氤氲

宗室太子右司禦率府率宗彥夫人張氏墓誌

銘并序

夫人姓張氏祖遵以材勞受男爵歿贈邠州觀察使父
文慶左班殿直夫人生而淑麗聞諸姻黨時平陽懿恭
王少子今司禦率府率宗彥邁求佳匹協幹宗事允矣
邦媛宜於吉卜乃展禽帛之聘歸於邸第執笄奠菜婉

如肅如懿恭宗藩之望胄緒昌衍夫人協和娣姒雅有
禮法褒封未逮穠華遽零凡好合八年以慶歷壬午七
月既望終於內寢春秋二十四越月塗殯資福精舍甲
申孟夏歸窆洛陽永安從邦族之大塋順也三男長仲
寂次仲向並太子右內率府副率一未名三女詞臣被
旨銘其墓曰懿女士兮洵美且孌嬪天孫兮弗偕避年
曉風急兮捲祥雲秋霜繁兮摧芳莖伊之溪兮嵩之麓
魂兮歸來安幽阡

金匱要略卷之八
右監門衛大將軍仲炎夫人秀容縣君李氏墓

誌銘并序

秀容縣君李氏章懿皇后之姪女也。曾祖延嗣尚書令
吳國公祖仁，德尚書令秦國公考用，和中書令安定郡
王章懿皇后，誕生仁宗皇帝。以外家之重，闕裔光大，秀
容幼聰惠，今慈壽太皇太后養於閤中。仁宗選皇族之
秀，以歸於右監門衛大將軍仲炎，有子五，人士良士，屏
皆終於內，率府副率次亦亡二人。幼未名，女一人早夭。

秀容以貴戚之後為宗室婦盥櫛事舅姑謹恪嚴翼如
出寒素無怠弛之意治平四年三月甲戌以疾終年二
十有四權厝于奉先佛舍八月癸酉從英宗靈駕往葬
於河南永安銘曰善事舅姑從夫以順貴出后家惟循
箴訓云何先春凋此芳輝二子肯堂尚承淑問

左驍衛大將軍世謚夫人仁壽縣君安氏墓誌
銘并序

仁壽縣君安氏贈左驍衛大將軍世謚之配祖習解州

防禦考惟演東頭供奉官十有四歲而歸驍衛驍衛纔
冠捐館仁壽奉姑清河郡夫人張氏婦道甚備供養謹
恪未嘗不適其意治平二年六月辛卯卒年三十有七
四年八月英宗靈駕西引從窆於永安以祔其夫之塋
子一人令業右監門率府率早世仁壽既傷其夫而哀
其姑又悼其子於是口不茹葷手不釋佛書痛自勉約
如是積年竟先其姑而亡可悲也矣銘曰無夫何儀無
子何依苦志靡它之死不違勤勞瘁劬奉承其姑二紀

一心之死不渝春露易晞秋華易萎從夫違姑姑情獨
悲

宗室右監門率府副率仲甫夫人魏氏墓誌銘

并序

夫人姓魏氏曾祖仁浦追封秦王祖咸熙累贈工部尚
書父昭文西上閤門使封州刺史秦王國初執政勲在
王府故夫人伯祖保平軍節度使同中書門下平章事
鄆國公咸信尚太祖皇帝女許國恭惠大長公主遂為

國戚閼閼益熾夫人年十七有行潞邸好合五年室家相宜以慶厯甲申六月丁卯云胡不淑奄就大夜享年二十有一男三人長某右監門率府率餘未名夫人姿儀秀靜性稟惠淑肇絲組繡曲盡工巧事父母孝事舅姑順事夫有禮遇娣姒謙以和撫下恩意甚至生大族歸皇族不驕不忌亦婦道之難也初厝於晉濟佛舍五年四月二十八日從潤邸楚國太夫人靈仗歸葬永安大塋宗室之尚制也有詔詞臣俾識幽窆銘曰猗惟夫

人貴戚之生宗子之嬪逮日之吉歸以翟茀庶宜爾室
胡然妙齡電泡不停蕙蘭摧馨栢城鬱鬱泉深土實國
之豐畢丹旆素輿靈其就途從其王居

右清道率府率世顯夫人高氏墓誌銘

并序

夫人高氏祖瓊以才武典禁兵領忠武軍節度使父繼
隆引進使陵州團練使母金華縣君呂氏夫人生而美
秀性且明慧輦絲箴管曲盡工巧絃簧音律雅通其妙
溫靜莊肅天資有裕吳懿王諸孫右清道率府率世顯

方求淑媛以主內治聞夫人之懿因問名而卜之吉遂
納幣贅鴈以慶歷丙戌十一月歸於吳郎既祭於禰室
家甚宜入謁中禁儀容有度接諸宗黨莫不洽比結縭
暮歲載震彌月方緩帶以為喜遽收華而早謝丁亥十
月五日卒於燕寢哀哉若人之不淑始十有七歲矣厝
於奉先精舍戊子六月往窆河南永安縣之大塋一子
曰令典率府副率噫以清道之宗戚近屬以夫人之世
家令範宜夫膺魚軒象服之寵享鵲巢螽斯之慶琴瑟

偕樂福壽相終而摧芳先秋淪精長夜吁嗟乎彼蒼何
賦與之獨嗇也銘曰彼姝者子溫且惠兮既笄有行合
嘉配兮謂克享年福祿萃兮祥烟彩霞遽彼沫兮依
然手澤在輦悅兮揚且之哲忼相對兮翩翩者旌素
車邁兮鏤石紀文納泉隧兮

皇第八女追封韓國公主石記文

慶厯紀年龍集作噩孟夏二十五日辛亥皇第八女齊
國公主薨出於都城西普濟佛舍以須臾還宸衷愴悼

有詔追封于韓再不視垂拱朝甲寅為舉哀于後苑羣
臣叙班慰於崇政殿之門外時皇族楚國太夫之喪歸
祔潤恭靖王之兆故因其儀仗載堅周以輶車五月丁
卯葬諸永安陵園本朝之故典也公主以癸未季冬十
日實啓謁衣之慶生而明秀自然溫淨每省中建道
場聞梵唄鐃磬之音輒有悅色以故嘗依浮圖法號
為保慈崇祐大師及是疾良美乃下制改封于鄧再
進大國於齊噫稟和天粹託體帝家以鍾念于淵慈

故荐膺於寵數故不遐壽永嚮多福早歲逝矣彼蒼
何哉不歸兜率之宮親承受記必向迦維之國還復下生
被旨撰文用識幽夢謹記

故鄆國公主石記文

公主今皇帝之息女母曰御侍馮氏以慶歷二年六月
二日生三年八月十八日卒火於奉先佛舍初宮闈叢
慶荐啓紡塼之吉而公主於諸女行第五韶穎明秀瓊
膚紺髮真天人之相方且詔有司條西漢之制以䟽脂

沐酌開元之典以錫嘉號制未及下雨淫邁厲奄至不
淑宸扆眷悼乃有鄆國之贈國朝之故自帝子下逮諸
宗室凡未封爵而殤雖追貴一品不專舉仗衛及是燕
恭惠王之鹵簿將陪葬於永熙故公主從焉載以輶車
大鴻臚持節護行以甲申孟夏癸卯藏于莊懿太后
之陵域不封樹從舊制也臣某載筆以司宗譜承詔
撰著得詳錄云謹記

宗室銀青光祿大夫檢校國子祭酒行太子右

內率府副率兼監察御史武騎尉仲產石記

文

皇姪右屯衛將軍宗迴之第四子曰仲產曾祖潞恭憲王
祖贈安遠軍節度使密國公允言母曰河南縣君梁氏
以康定辛巳十月始育慶厯壬午春三月賜名一命為
銀青光祿大夫檢校國子祭酒行太子右內率府副率
兼監察御史武騎尉是歲十一月卒後二年夏四月癸
卯舉而藏于洛之永安大塋國家錫美貽謀宗姓蕃昌

故尊者茅土以胙之卑者爵命以寵之枝葉扶疎本根深固羨乎哉隆且盛矣產也不幸而夭逝亦命而已矣
謹記

宗室右監門衛大將軍世滋故長男太子右監

門率府率令輯石記文

令輯字君瑞冀康孝王之曾孫贈陳州觀察使追封淮陽侯守約之孫左監門衛大將軍世滋之子母曰長樂縣君王氏於皇上為姪曾孫慶歷四年正月乙酉生於邸第

俄值誕節恩命之名錄為太子右內率府副率賜階銀
艾檢校上庠祭酒憲銜兼監察勲武騎尉八月遷右監
門率府率是歲仲冬親郊園丘均慶宗室加散官殿中
改勲騎都尉越五年五月既望日而天甫及二歲權厝
于普安佛舍夏四月坎而藏於永安大塋康孝王實太
祖皇帝之孫德厚流光本支蕃衍矧維睿聖親親之篤
故殤子未違襁抱而寵錫數加賦命不遐奄違昭世哀哉
謹記

宗室右監門率府率仲郢第三男石記文

宗室右監門率府率仲郢之第三男以慶歷三年八月
生五年三月六日夭歿贈安遠軍節度使密國公允言
之曾孫左千牛衛大將軍嘉州刺史祁國公宗說之孫
也母曰郭夫人密國蓋路恭憲王之次子其系實出於
太宗皇帝本朝典故凡宗子賜之名則加於官若殤子
者灑流濬源分華金枝未再周星遽隨逝水一命不
及非命也夫初厝于普濟佛舍即以夏五月十二日

掩于永安之域從舊制也謹記

宗室右千牛衛大將軍宗訥第四男石記文

殤子潞恭憲王曾孫贈鎮江軍節度使兼侍中鄒國公
允成之孫左千牛衛大將軍宗訥之第四子母曰長樂
郡君賈氏康定二年辛巳七月十六日載誕慶歷壬午
七月十五日夭卒生甫周歲奪於襁抱未壬命未錫名
故無紀者初火于永寧佛舍越甲申夏癸卯坎而藏於
永安大塋國家源流深長本支蕃衍諸宗室子垂髫佐

餒即就師傳教之方名數目稍隸簡諒拜官賦祿矣故
皇屬不患爵位惟不享年末如之何已茲殤子之所
可悼也謹記

宗室故贈潁州防禦使汝陰侯宗育第二男石
記文

殤子潞恭憲王曾孫贈安遠軍節度使密國公允言之
孫贈潁州防禦使汝陰侯宗育之第二子母濮陽郡君
吳氏以康定辛巳十一月載誕慶曆壬午八月夭卒生

未周星奪於襁抱未王命未錫名故無紀者初火于薦
嚴佛舍越甲申孟夏從燕恭惠王葬伏藏于永安大
塋吉壤廣原諸宗室之收宅使逝者而可作殤子且
保于父祖矣又何愴焉謹記

宗室右屯衛將軍宗迴第五子石記文

皇室右屯衛將軍宗迴其第五子以慶歷壬午年閏九
月生旬日而歿蓋太師尚書令潞恭憲王曾孫贈安
遠軍節度使密國公允言之孫母曰河南縣君梁氏初

火于薦嚴佛舍甲申四月舉而藏于永安之大塋國家
推親親之恩雖始生之嬰而莫或遺也其于敦睦收卹之
道亦云至矣謹記

故銀青光祿大夫檢校國子祭酒右監門率府
率兼侍御史上騎都尉仲涵石記文

故右監門率府率諱仲涵左監門衛大將軍宗懿之長
子平陽懿恭王孫潞恭憲王之曾孫也母中山郡杜氏
慶曆辛巳三月十二日生三月而賜名授太子右內率

府副率兼監察御史是歲郊祀慶成加恩殿中侍御史
四年遷今官其年復以郊祀加恩改兼侍御史七年四月
二十日卒於邸遂殯于奉先精舍八年六月六日徙窆
於河南永安縣之大塋率府資性孝謹不好戲弄勝衣
就傳學方甲書數墨筆字蹟已中楷法頗習丹青之藝
亦有可觀方將討論文史趨為善之樂賦命不淑既韶而
殯其可哀也已謹記

左監門衛大將軍宗楷第八男石記文

宗室無服之殤曰左監門衛大將軍宗楷之第八子母陳留郡君吳氏以慶歷丙戌三月十二日生舉以文綵粲然珠潔雍樹顧復免於水火以丁亥七月十三日卒哀哉未名故未之命也其夭之遽已櫛而焚之藏于奉先精舍戊子六月六日葬永嘉郡王于永安大塋殤子從與瘞焉國家親親廣愛以風天下惟是飾終之典尤為纖悉又詔詞臣為之識訥諸幽坎厚之至也謹記

宗室太子右內率府副率仲郢長女石記文

潞恭憲王曾孫贈安遠軍節度使密國公允言之孫左
千牛衛大將軍宗說之子曰右內率府副率仲郢其耦
汾陽郭氏以康定二年八月始生一女凡二歲感疾而殞
即日從浮屠氏茶毗法而置之法濟精舍後二歲歲在甲
申夏四月舉而藏於伊南之大塋夫古所謂殤者不以成
人之禮舉之也本朝惇叙協和軫懷於夭奪所以廣慈
愛之道而立教于天下也已謹記

祁國公宗說第六女石記文

慶歷八年六月六日葬永嘉郡王於河南府永安大塋故
事凡柩之厝殯者雖不成殤舉以是日窆若瘞焉今殤女
之封用茲典也潞恭憲王之曾孫贈安遠軍節度使密國
公允言之孫千牛衛大將軍祁國公宗說清河郡君張氏
之第六女也質秀體淑美哉其容也柔聲下色嘉哉其言
也箴管盤悅敏哉其功也恭孝謹順懿哉其德也不幸感
疹十一歲而卒蓋慶歷七年二月十五日也笄纓之期甫
及脂澤之田未封蘭始薰而霜彫珠將圓而月缺故宗黨

所以悼戚之尤甚也已謹記

宗室右屯衛將軍宗嚴第七女石記文

皇從姪右屯衛將軍宗嚴之第七女以慶歷辛巳十一月誕育壬午八月天逝火于薦嚴佛舍越甲申孟夏癸卯舉而藏諸永安大塋殤女潞恭憲王曾孫贈侍中鄆國公允成之孫生未周星奪於襁抱珠碎掌上蘭摧庭中父兮母兮慟慟何及往安幽坎尚慰二人謹記

宗室右屯衛將軍宗嚴第五女石記文

慶歷甲申舉諸宗室暨諸小喪從燕恭惠王以西而殤
女在焉女潞恭憲王曾孫贈鎮軍節度使兼侍中郇國
公允成之孫右屯衛將軍宗嚴之第五女母曰長樂郡
君潘氏寶元己卯十月誕育慶歷壬午閏九月三日遘
疾夭卒年四歲殤女之始免於懷垂髻佩燧知承母教
習於顰絲濬發其源本銀潢之一派華而不秀推玉樹
於先春初火于薦嚴精藍及此掩於永安之域實甲申
孟夏之癸卯也髣髴弱魂往安幽埴謹記

安德軍節度使華原郡王允良第九女石記文


華原郡王第九女母英國夫人張氏慶歷乙酉歲六月設
帨於門右且示有紡事焉負以文祿舉之於寢粹然而玉
潔粲然而珠媚既孩則顧指戲笑裕如也不幸病悻先朝
露以晞蓋丙戌歲之七月也遂厝櫬於廣福精舍慶歷
八年從父永嘉王薨鴻臚護喪以六月六日葬永安原
女亦從而瘞焉華原燕恭肅王之冢嗣實出太宗皇帝
謹記

左龍武衛大將軍信州團練使安國公從古第

四女道娘石記文

宗室左龍武衛大將軍信州團練使安國公從古之第四女道娘宜幼真母京兆郡君宋氏以明道癸酉歲有衣褐之喜幼真天資端秀異于羣兒性復穎悟所學輒善組訓餘力尤好筆札日事熏衲誦金仙書慕習其教侍安國公京兆君旁惟顏色所嚮而俯仰承接於婉若方且總羈就筭卜歸良族容纓未佩膏肓感疾上遣太醫高

手以視而藥石不效慶厯丁亥四月十一日卒年十有
五矧才德既顯惟有待而發之惜哉天奪其壽故諸宗
黨所以痛悼甚焉上為嗟惻祔以冠帔賻幣有加即厝
於奉先禪院以慶厯戊子六月六日附窆曾祖潭康惠
王之園兆謹記



樂全集卷三十八